



UPA 2015/134
12.maj 2014
Kalistat Lund

Inissialiortitsinermi pisortat tapiissutaasa qanoq agguarneqarnissaannik ineqarnerlu pillugu aaqjissuusseqqinnissaq qanoq ittoq Naalakkersuisut Inatsisartunilu ilaasortat qanoq isumaliuutersuuteqarpat?

(Inatsisartunut ilaasortaq Ane Hansen, Inuit Ataqatigiit)

Namminersorlutik Oqartussat inissianik attartortitsisartutut pisussaaffeqarnerat pisariaqartitsisunut periarfissiineruvoq sullissilluarnikkut naammaginatumik ingerlanneqartussa.

Angerlarsimaffik toqqissisimanartoq tassaavoq tamatta inuttut ingerlalluarnissatsinnut aallaaviusoq aamma taannaavoq inuunitta oqaluttuassartaanut annertuumik tunngavileeqqataasartoq. Inuiaqatigiit inissaqarnikkut periarfissanik isumannaatumik aaqjissuussivigineqarnissaat pisussaaffiuvoq pingaarutilik.

Nunatsinni ineriartorsimanerup taamma isikkoqarsimanerata kinguneranik, pisortat imminnut annertuumik isumalluutissanngortissimapput inissaqarniarnermi aallaaviunissaminnut, tamannalu akisussaaffik naammaginatumik ingerlanneqartariaqarpoq.

Pisortat inissiaataanni najugallit attartortutut ataqqinassuseqarnerat eqqaamaneqartariaqarpoq pisortallu attartortitsisutut aamma pisussaaffeqarput attartortitap naammagintuunissaannik. Attartortummi pigilinngisaannagassaminnut najugaqarallartillutik akilersuijuartussaasarput, najugaqarfisik ilaatsigut kiffiarnerlugaannermigut igalaalunnergulluunniit kiassaruminaallinikumut.

Ullumikkut inissiani najugaqartut qaammammut akiliutigisartagaasa pingajorarterutaasa missaat kiassarnermut akiliutaasarnarpaat. Inissiallu pisoqqat sananeqarsimanermi ataatsimoorussassamik kiassaasersorneqarsimasarmata, tassuunnakkut sipaarniartoqarsinnaannera periarfissaasimanani. Inissiani najugaqarnermi akiliutaasartut appasinnerulissappata kiassarinnikkut akiliutaasartut aaqjissuussivigineqartariaqarsoraarput. Ullumikkut ineqarnermut tapeeriaatsini (boligsikring) kiassarnermi akiligassaq tapiissuteqarfineqarneq ajorpoq. Inissiat pisortat akisussaaffigisaat, kiammik atuiiffusorujussuupput qulaanni taariikkannik sanngiiffeqarnertik patsisigalugu. Nalilersorneqarniarli kiassarnermut akiliutaasartut, ineqarnermi tapiiffigineqartarnermut ilanngunneqassannginnersoq, najugaqartummi tamakkiisumik pisuussutigineq ajormassuk taamma kiammik atuitiginertik.

Suulluunniit tapiissutit pisariaqartitsivinnermik aallaaveqartartariaqartut isumaqarpugut. Inuiaqatigiinni atukkatigut assigiinngitsorujussuarmik atugaqarfiusumi kikkut tamaasa tapiisuteqarfisarlugit ingerlatsineq unitsinneqartariaqarsoraarput.

Nalilersorluarneqartariaqarsoraarput aningaasaleeriaatsit illuliornernut inissialiornernulluunniit tapiissutigineqartartut qanoq atorneqarsinnaannissaat. Soorlu 20/20/60-mik taallugit tapiissutitalinnik attartorsinnaannermut periarfissaq nalilersugassanut ilaasariaqarsoraarput. Aningaaseriviit aqutugalugit pisortaniit taperneqarnatik illuliornissaminnut akissallit taperneqartarnerat pissusissamisunngilaq.

Illuliornissanut tapiissutit suogaluartulluunniit pisortanit tapiissutigineqartut, inuup

taperneqartup illumik najugaqarfissaminik peqalernissaanut tapiisutaasarnissaat qulakkeerneqartariaqarsoraarput. Unnuisarfiliornissanut assigisaannullu aningaasaliisarnerit allatigut ingerlanneqartarnissaat pisassammat.

Neriuppugut manna oqallinneq aallarniutaassasoq, nunatsinni najugaqariaatsitta tamanit atoruminarnerulernissaannut alloriarnissamut.